

Komisioni për Mbrojtjen e Konkurrencës, në bazë të nenit 28 dhe nenit 19 paragrafi (1) pika 2) të Ligjit për Mbrojtjen e Konkurrencës (“Gazeta Zyrtare e Republikës së Maqedonisë” nr. 145/10, 136/11, 41/2014, 53/16, 83/18 dhe “Gazeta Zyrtare e Republikës së Maqedonisë së Veriut” 208/24 dhe 16/25), duke vepruar sipas njoftimit për përqendrim të parashtruar nga personi fizik Zoran Kondratenko nga Shkupi XXX, në seancën e mbajtur më 09.03.2026, mori këtë:

AKTVENDIM

1. Vërtetohet se përqendrimi me të cilin personi fizik Zoran Kondratenko nga Shkupi XXX, do të fitojë kontrollin mbi Shoqërinë për prodhim, inxhinieri, tregti dhe shërbime MONTING INZHENERING SHPK Manastir, rr. Novački pat nr. 7 Manastir, edhe pse bie nën dispozitat e Ligjit për Mbrojtjen e Konkurrencës, nuk do të ketë si pasojë parandalimin, kufizimin ose shtrembërimin e konsiderueshëm të konkurrencës efektive në treg ose në një pjesë thelbësore të tij, veçanërisht si rezultat i krijimit ose forcimit të pozitës dominuese të pjesëmarrësve dhe **është në përputhje me dispozitat e Ligjit për Mbrojtjen e Konkurrencës në kuptim të nenit 19 paragrafi (1) pika 2) të Ligjit për Mbrojtjen e Konkurrencës.**

2. Detyrohet parashtruesi i njoftimit për përqendrim të paguajë taksën administrative për njoftimin për përqendrim në shumën prej 6.000,00 den. dhe për aktvendimin në shumën prej 30.000,00 den., sipas numrit tarifor 34 të Ligjit për taksat administrative (“Gazeta Zyrtare e Republikës së Maqedonisë” nr. 17/93, 20/96, 7/98, 13/01, 24/03, 19/04, 61/04, 95/05, 7/06, 70/06, 92/07, 88/08, 130/08, 6/10, 145/10, 17/11, 84/12, 192/15, 23/16 dhe “Gazeta Zyrtare e Republikës së Maqedonisë së Veriut” nr. 151/21) në llogarinë e Buxhetit të Republikës së Maqedonisë nr. 100000000063095, llogaria paguese 840...03161, shifra e të ardhurave dhe programi 72231300.

3. Padia për iniciimin e kontestit administrativ nuk e shtyn ekzekutimin e aktvendimit.

Arsyetim

Në përputhje me dispozitat e nenit 15 të Ligjit për Mbrojtjen e Konkurrencës (në tekstin e mëtejshëm: Ligji), më datë 26.01.2026 dhe plotësuar më 12.02.2026, në Komisionin për Mbrojtjen e Konkurrencës (në tekstin e mëtejshëm: Komisioni) u dorëzua njoftimi për përqendrim nga personi fizik Zoran Kondratenko nga Shkupi XXX, me të cilin Zoran Kondratenko do të fitojë kontrollin mbi Shoqërinë për prodhim, inxhinieri, tregti dhe shërbime MONTING INZHENERING SHPK Manastir, rr. Novački pat nr. 7 Manastir.

Komisioni filloi me shqyrtimin e Njoftimit me ditën e pranimit të tij dhe në bazë të të dhënave të dorëzuara në Njoftimin për përqendrim, plotësimeve dhe shtojcave të tyre konstatoi sa vijon:

Aktivitetet kryesore afariste të ndërmarrjeve të përfshira:

Personi fizik Zoran Kondratenko është pronar i një pjese kontrolluese në:

-Shoqërinë për prodhim, tregti, shërbime dhe konsulencë TEHNOIZHENERING PRO SHPKNJP Shkup, me seli në Bulevardin Serbia nr. 2 Shkup, me veprimtari: aktivitete inxhinierike dhe konsulencë teknike e lidhur me to;

-Shoqërinë për tregti dhe shërbime HOUM ROBOTS SHPKNJP Shkup, me seli në rr. Nobelova nr. 17 Shkup, me veprimtari: tregti me pakicë e aparateve elektrike për amvisëri;

-Shoqërinë për prodhimin e energjisë elektrike, tregti dhe shërbime MONTING ELEKTRO PROIZVODSTVO SHPK, me seli në Novaçki pat nr. 1 Manastir, me veprimtari: prodhimi i konstruksioneve metalike dhe pjesëve të tyre.

Personi fizik Zoran Kondratenko ka kontroll të përbashkët mbi:

-Shoqërinë për prodhim, inxhinieri, tregti dhe konsulencë për lëndë djegëse të lëngshme dhe të gazta ENERGO SISTEM Mihajlo dhe Zoran SHPK import-eksport Shkup, me veprimtari: inxhinieri dhe konsulencë teknike e lidhur me të; dhe

-Shoqërinë për prodhim, inxhinieri, tregti dhe konsulencë ENERGO SISTEM INSTALACII Shkup, me veprimtari: inxhinieri dhe konsulencë teknike e lidhur me të.

Shoqëria për prodhim, inxhinieri, tregti dhe shërbime **MONTING INZHENERING SHPK Manastir** ka si veprimtari prodhimin e konstruksioneve metalike dhe pjesëve të tyre.

Komisioni konstatoi se përqendrimi i njoftuar bie nën dispozitat e Ligjit, pasi plotëson kushtet nga neni 12 paragrafi (1) dhe nga neni 14 paragrafi (1) pika 1) dhe 2) të Ligjit për Mbrojtjen e Konkurrencës.

Komisioni, duke marrë parasysh kriteret nga neni 17 paragrafi (2), paragrafi (3) dhe paragrafi (4) të Ligjit për Mbrojtjen e Konkurrencës dhe pikës 6 b) të *Udhëzimeve për përcaktimin e rasteve në të cilat gjatë vlerësimit të përqendrimeve Komisioni për Mbrojtjen e Konkurrencës zakonisht do të konstatojë se të njëjtat janë në përputhje me Ligjin për Mbrojtjen e Konkurrencës*, vlerësoi se përqendrimi i njoftuar, megjithëse bie nën dispozitat e Ligjit, është në përputhje me të pasi nuk do të ketë si pasojë pengimin, kufizimin ose cenimin e konsiderueshëm të konkurrencës efektive në treg ose në një pjesë thelbësore të tij, veçanërisht si rezultat i krijimit ose forcimit të pozitës dominuese të pjesëmarrësve.

Duke marrë parasysh këtë vlerësim të përqendrimit, Komisioni vendosi si në dispozitivin e këtij Aktvendimi, në përputhje me nenin 19 paragrafi (1) pika 2) të Ligjit.

Në përputhje me nenin 53 paragrafi (2) të Ligjit, padia nuk e shtyn ekzekutimin e aktvendimit.

Udhëzim për mjetin juridik:

Kundër këtij aktvendimi mund të paraqitet padi për ngritjen e kontestit administrativ pranë Gjykatës Administrative në afat prej 30 ditësh nga dita e pranimi të aktvendimit.

KOMISIONI PËR MBROJTJEN E KONKURRENCËS

KRYETARE

Mr. Малинка Силјановска Николиќ